



Fasnacht 2009

Y ha miesse mini Bänggler entloo,
drum stand ych elai mit dem Gschodyym do.
D Rezzesion het mi schwäär troffe,
ha nur no uff e Wunder kenne hoffe.
Mir zwai hän sii jetzt iibernoo,
drum wänn mir vom Bund au Gäld bikoo.

Muesch in s Spitaal gheresch: "Was macht Ihnen Weh?"
In dr Baiz : "Bitte schön Ihr Kaffee."
E Verkäufer froogt: "Was darf ich Ihnen Zeigen?"
In dr Hääfelischuel: "Kommt wir bilden einen Reigen."
Das Schwoobedytsch duet uns gruusig steere
wie scheen wär s, in Baasel, e Ziircher z heere.

Dr Sämi Schmid dä armi Maa,
weiss nit worum är nymme kaa.
Sehr vyyl isch uus sym Schnürli ko,
doch kaine ka si Gschnur verstoo.
Dr Nef dä sait doo nur: "Hösch Digge,
sotisch halt mee E- Mails verschigge."

D Zyt isch schnälläabig und veruggt,
hän Faasnachtskiechli am Sylveschter verdruggt.
Frieligsgfiel ka e Drache im Dezämber ha,
sogar fir e scheene Hoorloose Maa.
Wie das goot, macht uns Gigi vor,
si schänggt sich dr Groos, fir wyteri zwai Joor.

Bisch e bizz im Hirni schwach,
oder griegsch dehei ains uff s Dach.
Hesch Kompläx, isch di Glaine z kurz,
bisch z klai und hesch suscht e Furz.
Um das kompensiere ha ich erfaare,
duesch sicher au Offroader faare.

Zwai Trottoirschwalbe steen am Egge,
und dien e bizz e Schugger negge.
Är froggt wiesoo si zämme doo dien stoo,
me kaa jo kuum me duure go.
He Schugger, mach jetzt nur kai Ghetz
mir untersteen im neye Dierschutzgsetz.

Die näägschti Faasnacht oh herjee,
mir kenne glaub in d Zuekunft gsee.
D Stadt in digge Rauch yyghüllt,
und alles nach dr Fyyrweer brüllt.
Halb soo Schlimm, sait aine doo,
es sind nur d Raucher, wo mien dusse stoo.

Im Erdogan brennt s Hirni duure,
well är am WEF nit derf Schnuure.
Jo, ich weiss das duet aim blooge,
wenn nit derfsch saage oder frooge.
Muesch do mit ihm kai Mitlaid ha,
denn du bisch dehai nit besser dra.

Dr Ranze halber uff em Disch,
Gney an Gney will s sehr äng isch.
So hoggt me vor dr Riobar,
das neyi Gsetz isch unhaltbar.
E Schugger maint, isch dir bekannt,
dy Fyydle luegt scho iiber dr Rand.

Dr Busch het Amerika in Griise gritte,
mit dr halbe Wält nur umegstritte.
Busch o Busch dini Zyt isch duure,
zem Abschiid bikunntsch fascht e Schueh an d Schnuure.
Mir hän die Szeene soo richtig gnosse,
numme schad, het dä Duubel, dr nääbe gschosse.